



Սույն գիրքը թվայնացվել է Գրքասեր ՀԿ-ում՝ հայերենով գրականության պահպանման, հանրայնացման և ժամանակակից թվային միջավայրում հասանելի դարձնելու նպատակով:

Կազմակերպության նախաձեռնությունը միտված է հայերեն գրքերի և տեքստերի տարածմանը, ընթերցանության խթանմանը և մշակութային ոչ նյութական ժառանգության պահպանությանը՝ ապահովելով դրանց հասանելիությունը հնարավորինս լայն շրջանակների համար:

Մենք հավատում ենք, որ թվայնացումը ոչ միայն պահպանման միջոց է, այլև գիտելիքի, գրականության և մշակույթի շարունակական փոխանցման կարևոր ուղի:

Գրքասեր ՀԿ-ն գրքերը ձայնագրում և թվայնացնում է բացառապես Ձեր նվիրատվությունների շնորհիվ: Կազմակերպությանը կարող եք օժանդակել հետևյալ հղումով՝

<https://grqaser.org/hy/donate>

Ստուգված

Իսպանական գրականություն, Արձակ

13+

Թարգմանիչ՝ Աշոտ Զերոբյան

Ֆեդերիկո Գարսիա Լորկա Ինչպես է երգում քաղաքը նոյեմբերից նոյեմբեր

Տիկնալք և պարոնալք:

Ինչպես երեխան՝ հմայված մոր տոնական զուգվածությամբ, հյուրին քաշում է նրա մոտ, այդպես էլ ես եմ ուզում ձեզ ցույց տալ իմ Իմ Գրանադան: Դա անհնար է առանց երաժշտության, և ես պիտի երգեմ, չնայած վարպետ չեմ: Ես երգում եմ պոետի պես, ավելի ճիշտ՝ ինչպես ամեն մի խաշնարած: Ձայնս աղքատ է և կոկորդս էլ սոխակի չէ: Եվ միք զարմանա, եթե տեղ-տեղ աքլորի պես ծղրտամ: Այնուամենայնիվ, այդ դավաճան թևավորը, հավատացնում եմ, չի լինի այն չար թռչունը, որ ճանկոտոտում է տենորներին ու ծվատում է նրանց փառքը, և, եթե հանկարծ դուրս թռնի կոկորդիցս, ես կհմայեմ նրան և կասեմ՝ արծաթե թռչուն, նստիր աղջկա ուսին, այս դահլիճի ամենաթախծոտ աղջկա:

Բնիկ գրանադացին, եթե վերադարձել է օտարությունից ու ճանապարհին կուրացել է, տարվա եղանակը կորոշի փողոցում հնչող երգերից:

Եկեք մենք էլ փակ աչքերով անցնենք: Թողնենք մեր աչքերը սպուտեղի վրա, որ այսուհետ միայն սուրբ Լուսիան չպարծենա:

Եվ հանուն ինչի՞ քաղաքի հետ հանդիպումը պիտի աչքերին վստահել և ոչ թե քիմքին կամ հոտառությանը: Ընկույզով մեղրաբլիթը, նշով կարկանդակն ու Լուսիարայի վանիլով հրուշակը, Գրանադայի մասին քիչ չեն պատմի, քան հախճապալիկը կամ մավրիտանական մի կամար, իսկ ուլունքաշար անիտնի և սալորի զարմանալի եզրազարդերով տուլեդյան նշակարկանդակը, որը Կարլոս Հինգերորդի խոհարարի հնարածն է, ավելի շատ է մեկնում նրա գերմանական Էոթյունը, քան նրա շեկ մորուքը: Եվ, եթե տաճարը կպած է այն հնությանը, որի մաշված երեսը հավիտենական է ու անհասանելի այսօրվա օրվան, ապա երգը հասնում է մեզ մեկ ցատկով՝ կենդանի ու թափառացող, ինչպես փոքրիկ գորտ, ու նրա թափիծների և ուրախությունների թարմությունը պակաս հրաշք չէ, քան փարավոնի

դամբարանից գտած ցորենի ծլարձակումը: Այսպես, ուրեմն. եկեք ունկնդրենք Գրանադան... (ձեռագրում էջ է պակասում):

Տարին, ինչպես գիտեք, ունի. չորս եղանակ՝ ձմեռ, գարուն, ամառ, աշուն:

Գրանադան ունի երկու գետ, ութսուն զանգակատուն, չորս հազար ջրիոսք, հիսուն աղբյուր, հազար ու մեկ շատրվան և հարյուր հազար բնակիչ: Այս բոլորից զատ կա լարային գործիքների գործարան և խանութ, որտեղ վաճառում են դաշնամուր ու շրթնհարմոն և, որ կարևոր է՝ դափ են ծախում: Հանգստավայր էլ ունի. երկուսը երգերի համար՝ Սալոնն ու Ալ-Համբրան, իսկ մեկն էլ արցունքների համար՝ թախիծի ծառուղին: Եվրոպական ռոմանտիզմի բուն եռթյամբ մի վայր և, ի լրումն սրանց, հրարվեստավորների մի մեծ զորաբանակ, որոնք իրենց զվարճալի աշտարակները կառուցում են Առյուծի պալատի հայելային ոճով, ուր ջրերի անշարժ երկրաչափությունն անգամ մոնչում է առյուծի կատաղությանը:

Մեկ ժայռեղեն, մեկ ձյունե, մեկ տեսիլականաչավուն լեռնապարը կախվում է երգերի վրա և, ճախրելու անկարող, նրանք թափվում են կղմիկորե ծածկերին, այրվում են շողերի մեջ կամ էլ շնչահեղձ են լինում հուլիսյան կծղած հասկերի մեջ:

Այդ երգերը դեմքն են քաղաքի և նրանցով է չափվում քաղաքի զարկերակը:

Ահա մոտենում ես և առաջին բանը, որ որսում ես՝ դադձի և իշառվույտի բույրն է, բույրը խոտերի, որ տորովել են ջորիների ու ձիերի սմբակների տակ, պճեղներից եզների, որոնք ցրված են գրանադական ողջ սարահարթով: Երկրորդը ջրի ձայնն է: Ոչ այն խելառ ջրի, որ հոսում է՝ ուր խելքը փչի: Ոչ թե աղմկոտ, այլ ռիթմիկ ջրի, հանդարտ հունի երկրաչափությամբ շտկված և հարմարված ոռոգման կարիքներին: Այն ջրի, որ հագեցնում է և երգում հարթության վրա, այն ջրի, որ տառապում է և տնքում լեցուն փոքրիկ լուսավոր ջուրակներով այնտեղ՝ վերևներում, խեներալիֆների այգիներում: Այստեղ խաղ չկա: Խաղը Վերսալի համար է, որտեղ ջուրը հանդիսախաղ է, չափազանցված ինչպես ծով, ինչպես երգելու անընդունակ ճարտարապետական հանդիսավոր մի համալիր: Գրանադայի ջուրը ծարավ է հագեցնում: Նա ապրում է և ծովված է նրանց՝ ով խմում է կամ լսում է նրան, կամ էլ ուզում է մեռնել նրա մեջ: Նա հասկանում է շատրվանի հոգեվարքը՝ ջրափոսում հանգչելուց առաջ: Այդ նրա մասին է Խուան Ռամոն Խիմենեսն ասել.

Ինչ տառապանք է. համբերատար
զառանցել անվերջ ազատ մի կյանք,
կռիվ տալ, ինչպես տեսիլքի դեմ,
փակուղիներում պաղ ու հավերժ,
և բաց ճակատով խփվել պատին,
կռվել քարի դեմ լուռ ու անշարժ:
Երազում վերջին միայն տեսնել
ինքդ քեզ մի քիչ անհառաչանք:

Բացի սրանցից կա ևս երկու հարթավայր, երկու գետ: Նրանց ջրերը չեն երգում, այնտեղ արդեն ազատ աղմուկ է, մուժ է՝ խառնված լարերի հետ քամու, որ ուղարկում են սարերը: Դա Խենիլն է՝ բարդիներով. խավավորված և Դաուրոն՝ հիրիկներով եզրավորված:

Բայց ամեն ինչ չափավոր է, ամեն ինչ հաշտ է մարդու հետ: Ջուրն ու Զամին եթե քիչ են՝ հարմար լսելիք են: Սրա մեջ է Գրանադայի հմայքն ու եզակիությունը: Ամեն ինչ ներքին հարդարանքի համար է. փոքրիկ մի բակ, մի փշուր երգ, մի մատնոց ջուր ու քամի, որ պարում է ափիդ մեջ:

Կանտաբրիյական ծովը կամ էլ թունդ քամին, որ փշրվում է Ռոնդի ժայռերին, վախեցնում են սսկված, ներփակ, լուսամուտի շրջանակով բանտարկված գրանադացուն: Ձեռնասուն են դարձել ջուրն ու քամին, քանի որ տարերքների եռքը կոտրում է մարդկային ձայնաշարը և սրբում, հյուծում է մարդկային անհատականությունը, որը չի կարողանում գերիշխել այլևս և կորցնում է իր հորիզոնն ու երազը: Գրանադացին ամեն ինչ տեսնում է շրջված հեռադիտակով: Այդ պատճառով է, որ Գրանադան հերոսներ չի տվել, այդ պատճառով էլ

Նրա զավակներից ամենափառավորը՝ Բոաբդիլը, զիջեց քաղաքը կաստիլցիներին, այդ պատճառով էլ քաղաքը դարերով իր ապաստանը փնտրում է մեկուսացման մեջ, լուսնի լույսով նախշազարդված մլմլացող օջախների շուրջը:

Գրանադան ստեղծված է երաժշտության համար, որովհետև նա գերեվարված քաղաք է, ժայռերի մեջ փակված, քաղաք, ուր հղկում են մեղեդին, թաղում են և երկարացնում պատերն ու ժայռերը: Երաժշտությունը ներամփոփ քաղաքների ժառանգությունն է: Ե՛վ Սևիլյան, և՛ Մալագան, և՛ Կադիսը հոսում են իրենց ծովային դարպասներով, իսկ Գրանադան այլ ելք չունի, քան իր երկնային աստղազարդ նավահանգիստը: Նա ռիթմերի ու արձագանքների հանդեպ զգայուն ճգնավոր է, հենց ինքը մեղեդի է:

Նրա ամենաթանձր մարմնավորումը ոչ թե պոեզիան է տալիս, այլ երաժշտությունը միստիկա տանող այդ փշե ճամփան: Դրա համար էլ նա այնպես դրամատիկական չէ, ինչպես Սևիլյան՝ Դոն Խուանի քաղաքը, այդ սիրո քաղաքը, սակայն քնարական է, և, եթե Սևիլյան հրճվում է Լոպեի, Տիրսոյի և Բոմարշեի, Սորիյոյի գործերում և Բեկկերի արձակի մեջ, ապա Գրանադան իր շատրվանների նվագախումբն է՝ լեցուն անդալուզյան տիպրությամբ և վիուլելլա է Նարվաեսի ձեռքին, և՛ Ֆայա է, և՛ Դեբյուսի: Եվ, եթե Սևիլյայում իշխում է մարդկայինը, և պատերի տակ շրջում են Դոն Պեդրոն ու Դոն Ալոնսոն, Ֆիգարոն ու Մանյարան, ապա Գրանադայում միայն տեսիլներ են թափառում Նրա լքված երկու պալատներում, և զնգուն խթանները դառնում են մարմարե անեզր հատակների վրա մոլորված քնկոտ մժղուկներ, սիրային երկտողը՝ մի փունջ խոտ, իսկ սուրը փխրուն մանդոլին, որի լարերին համարձակվում են դիպչել միայն սարդերն ու սոխակները:

Մենք հասել ենք Գրանադա, Նոյեմբերն սպառվում է: Այրվող ծղոտի բույր է, և արդեն փտում են թափվող տերևների կույտերը: Անձրևի հեղեղ է և դատարկ է քաղաքը: Սակայն Արքայական դարպասների մոտ մի քանի կրպակ կա: Լեռները փաթաթվել են ամպերով և կարծես ներծծել են իրենց մեջ Զյուսիսի ողջ պոեզիան: Արմիլիայից, կամ էլ Սանտա Ֆեից, կամ էլ Ատարֆեից մի աղջիկ, աղախին երևի, վերցնում է կրպակից սամբուբան և սկսում է չորս խաշնարածների մասին երգը:

Գետանցի այն չորսից,
որ մոտ են ջրհոսին,
այն մեկը՝ ջորովը,
կուզենամ ինձ հասնի:
Գետանցի այն չորսից,
(քիչ մոտ են կայանին)
ջորովը սրտովս է,
կդառնամ նրան կին:

Երբ քեզ կրակ է պետք,
ուժի՞ց ես դու առնում:
Նայիր աչքերիս մեջ,
ածուխներ են վառվում:

Սա վիլյանսիկոյի մեղեդի է, որ հնչում է ողջ շրջանում, և որը մավրերը իրենց հետ Աֆրիկա տարան, որտեղ այն մինչև այսօր էլ հնչում է Թունիսում և հնչում է այսպես (մեղեդու արաբական մի տարբերակ է հնչում):

Չորս խաշնարածի մասին երգում են՝ մեկ-մեկ ծղոտ զցելով կրակի մեջ, շրջապատի բոլոր գյուղերում և այն հեռուներում, որոնք պսակի պես հյուսված են լեռնապարին:

Սակայն մոտենում է դեկտեմբերը, երկինքը պարզվում է, երամներով քշում են սագերին և դափերը, սամբուբաներն ու ճոճտանները խլացնում են քաղաքը: Գիշերով փակ տներում լսվում է Նույն մեղեդին, որը հոսում է պատուհաններից դուրս ու խողովակներով՝ կարծես իսկապես հողից է քամվում: Ձայները գորանում են, փողոցները լցվում են նախշուն վաճառարկղերով, խնձորների թեշերով, կեսգիշերային զանգը արթնացնում է դողանքը, որով միանձնուհիները շտապեցնում են լուսաբացը, իսկ Ալ-Համբրան ավելի է մթնում, ավելի

Է դառնում մարդախույս, և հավերժ պահում են ձվերը ցրտից կապտած ծղոտի մեջ: Արդեն սուրբ Թոմայի միանձնուհիները Անարատ Կույսին վեղար են հագցնում, իսկ սուրբ Յովսեփի գլխին դնում են դեղին տափակ գլխարկ: Արդեն կավե ոչխարներն ու բրդե շնիկները ցատկոտում են խաղալիքե մամուռների սանդուղքներով: Արդեն ասեկոսներ են գնում, և ահա այդ շաղակրատանքի խցանների ճայթոցի միջից, քերիչների ու պղնձե հավանգների զրնգոցից դուրս է արձնում ջրօրհների ռոմանսը ջահել ուխտավորների մասին.

Ջուխտ ուխտավոր անքսակ
եկան, հասան պապին,
որ օրհնի նա պսակը
խորթ քրոջ ու եղբոր:
Փեսացուն ժապավենը
չալմա էր դարձրել,
հարսնացուն դրել էր
Դիպակե գլխարկն իր:
Սակայն կամրջի մոտ
Նրանց դողը բռնեց,
փեսացուն մի բան չէր,
հարսնացուն դեռ ոչինչ:
Երբ գահին մոտեցան
պապի ճոխ պալատում,
հարսնացուն ու փեսացուն
ծեռից գնացին:
Հարցնում է պապը.
— Ի՞նչ է անունդ:
Փեսացուն թե՛ Պեդրո,
հարսնացուն՝ Աննա:
Հարցնում է պապը.
— Ի՞նչ տեղերից եք:
Տղան թե՛ Կաբրի,
աղջիկը՝ Ռոնդից:
Հարցնում է պապը.
— քանի՞ տարեկան եք:
Տասնհինգ ու տասնյոթ,—
լսվեց պատասխանը:
Հարցնում պապը.
— Ի՞նչ մեղք եք գործել:
Համբուրվել ենք թաքուն,
եթե դա մեղք է:
Իսկ աղջիկը արդեն
վարդից էլ կարմիր էր,
հենց լսել էր հարցը՝
բոցավառվել էր:
Մեկնեց պապը խաչը
ու մտքի մեջ ասաց.—
Այսպիսի մեղսագործ
գոնե մի զույգ էլ կա՞:
Չանգերը Հռոմի
հնչեցին ողջ գիշեր
ի նշան կատարման
այս ուխտի աննշմար:

Տարբեր խմբեր են երգում խաչմերուկներում, երգում են երեխաները դայակների հետ, երգում են խմած գեղուհիները՝ վարագուրված լուսամուտներով կառքերի մեջ, երգում են զինվորները՝ հարազատ վայրերի կարոտից, երբ նկարվում են խենիլյան գետափում:

Դա ինքը ուրախությունն է, փողոցների ժպիտն ու անդալուզյան ավյունը և չանհետացող մշակույթի ժողովրդի ամբողջ հմայքը:

Բայց ահա, մեկ առ մեկ անցնելով մարդաշատ փողոցներով, դուրս ես գալիս հուդայական ծայրամաս և տեսնում ես անապատը: Եվ այլ վիլյանսիկո է հնչում մոլթ տխրությամբ: Ո՞վ է երգում: Դա հենց Գրանադայի սվիրական ձայնն է, լացող ձայնը, ստվերներով բնակեցված երկու լքված ամրոցների մոտ Արևելքի ու Արևմուտքի կռվի արձագանքն է: Կարլոս Զինգերոդի և Ալ-Յամբրայի:

Սիրածս եկավ ու անցավ,
անցավ կողքովս:
Գլխարկի շուքն էր ծածկել.
Չտեսա դեմքը ես:
Լայնեզը գլխարկներն էր
ատեցի, ես ու իմ հոգին:
Կհանեմ մուռս, երբ գնեմ
մոտեցող ջրօրհներին:

Հոսում է ծննդյան վերջին ծիսերգը և քաղաքը ննջում է հունվարյան ցրտի մեջ: Բայց փետրվարի մոտերքում արևն ավելի պայծառանում է ու ոսկևորվում, մարդիկ գնում են դեպի լույսը, գնում են քաղաքից դուրս խնջույքի, ծիթենուտներում ճոճանակներ են կախվում և լսվում են նույն պարային «Էյ-հեյները», ինչպես իսպանական հյուսիսի լեռներում:

Ողջ Գրանադայում ժողովուրդը երգում է սառցի տակ խոխոջող ջրի հետ համերաշխ: Եվ խմբվելով ճոճանակների մոտ՝ գնում են ոտքերը. դեռահասները բացեիբաց, մեծերը՝ թաքուն: Սակայն քամին դեռ ոսկոր է ծակում:

Ծայրամասերը այս պահերին սուս են: Միայն շներն են ու ձիթենիների խշռոցը, և մեկ էլ շըլըմփ՝ շեմից դուրս են թափում լվացքաջուրը: Բայց դրա փոխարեն ձիթենուտներում խառնաշփոթություն է:

Աղջիկը ճոճանակից
չի ուզում դեռ կտրվի:
Նայում է տղան ցածից.
պարանը չկտրվի՞:
Ո՞ւր կընկնի
նա իր ճոճից.
կարոտիս
հեռու պոչին:

Այս երգերից մի քանիսը 15-րդ դարի հնչող արձագանքն են.

Ձիթենու պուրակ, մայրիկ,
կգնամ այս իրիկուն,
կնայեմ, թե ինչպես է
ճյուղերը քամին ճոճում,
ճյուղերը քամին ճոճում:
Կնայեմ, թե ինչպես է
քամին նրանց ճոճում:

Մեղեդին համարժեք է այն հոյակապ մեղեդուն, որ 1560 թվականին գրի առավ Խուան Վասկեսը.

Բարդիներին այցելեցի սվիրական,
տեսնելու, թե քամին ոնց է դադում նրանց:
Տրիանում, բարդիների շվաքում թաց,
իմ ցանկալին մեն մի անգամ ինձ տեսակցեց:

Բարդիներիդ հայացքի տակ, Գրանադա,
իմ հաճելին այցի եկավ իր նայադին:
Տեսնելու, թե քամին ոնց է դադում նրանց,
բարդիներին այցելեցի նվիրական:

Դասական ավանդույթը իր ողջ գեղեցկությամբ թևավորում է ձիթենու պուրակների այս
երգերը:

Չարմանալու հարկ չկա. ախր Իսպանիայում մինչև այսօր էլ իրենց նախաստեղծ տեսքով
հնչում են Խուան դել Էնսինի, Ֆուենլանի, Սալինասի և Պիսադորի երգերը և մեկ-մեկ էլ
հարություն են առնում Գալիսիայում կամ էլ Ավիլում:

Գիշերվան մոտ մարդիկ լքում են պուրակը, բայց հաճախ չեն ցրվում, այլ լուսացնում են
մեկնումեկի ծածկի տակ:

Իսկ գարնանը, երբ կանաչ բողբոջները հագիվ ծիլ են տվել, լայն բացվում են
պատշգամբները և ամեն ինչ անճանաչելիորեն փոխվում է: Կարծես թե մոլորվել ես
ձյուններում և մեկից դեմ ես առնում Չարավի դարպասներին:

Փողոցում երևում են աղջիկները, իսկ իմ մանկության տարիներին այգու նստարանին
հայտնվում էր Լուսնասեր մականունով տարաբախտ բանաստեղծը: Ծովափից
տակառներով թարմ գինի են բերում, և քաղաքը մթնշաղին երգում է այս երգը՝ մունետիկը
ցլամարտի, զուլալ, ինչպես մարտյան վերջին օրվա օդը.

Չինիտաս սրճարանում
Պակիրոն վեճն ավարտեց.
— Եռակի, քան դու, գնչու,
խիզախ եմ արենայում:
Պակիրոն նայեց ժամին
ու եղբորն ասաց վստահ.
— Կսատկի ցուլը չորսին,
դու գիտես. տերն եմ խոսքիս:
Էն չորսը երբ մոտեցավ,
եղբայրներն ելան փողոց:
Պակիրոն Էնպես անցավ՝
չես նայի առանց հոգոց:

Չետո էլ ի՞նչ: Երկու մտերիմներ հանդիպում են Խաչակիրների դարպասի մոտ, որով քաղաք
են մտել կաթոլիկ թագավորները.

— Բարիաջողում: Ի՞նչ կա Գրանադայում:

— Աստծու բարին: Ինչպես եղել է:

— Մարդիկ ի՞նչ բանի են:

— Ի՞նչ բան ու գործ. ո՞վ է տերը.
անվերջ զամբյուղ են գործում,
և դողանջում են անվերջ զանգերը:

Ապրիլից մինչև հունիս Գրանադան մի համընդհանուր զանգի դողանջ է: Ուսանողները չեն
կարողանում պարապել: Վիվարամբլ հրապարակի տաճարի զանգերը, ամպերի ու
ջրիմուռների մեջ թաքնված ստորջրյա զանգերը չեն թողնում գյուղացիներին իրար
ձայնածել: Սան-Խուանի զանգերը օդից տաշում են հեծեծանքների և բրոնզե որոտի ճոխ մի
զոհասեղան: Եվ լոկ Ալ-Ջամբրան է դառնում ավելի թշվառ, ավելի մարդախույս, ծվատված,
մեռած, քաղաքին օտար ու հեռու, ինչպես երբեք: Սալարկած փողոցներում պաղպաղակի

սայլակներն են, իսկ վաճառարկղերին չամիչով ու չամանով պաքսիմատներ են, և ամենուր ծախում են մեղրով եփած բակլայի պտուղներ:

Ծորում է Տիրոջ Մարմնի տոնը իր հսկաներով ու զաճաճներով և Տարասկա հրեշով:
Գրանադացի աղջիկներն իրենց չարխաքաշ թւերով և ծոցով՝ ինչպես մուլ մագնուիա,
հրավառության ջուլթակների, կրծկալների ճոխ թելերի մոլեգնության մեջ մեկից բացում են
հովանոցները՝ կանաչ, նարնջագույն, կապույտ և լողում են հառաչանքների, սիրո և կարոտի
կարուսելով դեպի հրավառության հրաշք թագավորություն, դեպի կախարդական «գնաս-
կկորչես» աշխարհը:

Գրանադայի հարթավայրի կողմից կաստանյետների տոնական կարկուտն է, իսկ նրան
ամենահնագույն փողոցներից մեկից՝ Էլվիրայից ընդառաջ է գալիս.

Ահա Էլվիրա փողոցով,
ընկերուհի երեք խափլան
գիշերով գնում են Ալ-Համբրա
և միշտ Էլ առանց ուղեկցող,—

քաղաքային խաղիկը, որը ամենակոլորիտովն է.

Այն թփի տակ, թփուտի,
շվաքում խոտի
Սիրելիս շունչն է պահել:
Օրն ինչ թախծոտ է:

Այն թփի տակ, թփուտի,
շվաքում բոխու
սիրելիս շունչն է պահել,
որ Էլ չդողա:

Այն թփի տակ, թփուտի,
շվաքում հերվա
սիրածս շունչն է պահել:
Փակել են վրաս:

Հրավառության վերջին բռնկման հետ, երբ հազիվ փլվում է Գրանադայի վրա նրա
ավարտական որոտը, մի մարդու պես բոլորը լքում են քաղաքը, և այն հանձնում ամռան
տապին, որն անցնում է ակնթարթորեն: Սպիտակ ծածկոցներով բազմոցները թափուր են,
պատշգամբները՝ փակ: Նրանք, ովքեր մնացել են, տեղափոխվում են բակ կամ ներքնահարկ,
սառցաջուր են ծծում բուրավետ վարդագույն կավե կժերից: Ապրում ու մտածում են
գիշերով: Դա այն պահն է, երբ ողջ քաղաքը գրանադիկա և ֆանդանգո է երգում կիթառի
նվագի ներքո՝ այնպես հովվերգական ու այնպես քեֆովցած հեռու-հեռուներով: Այսպես է
եղել հավիտյանս հավիտենից: Անցած ամառ, երբ ես ընկերներիս հետ, որոնք բոլորն էլ պարզ
մարդիկ են, երգում էի՝ մեր կողքին ռումբ պայթեց. գոնե մեկը հոնքը շարժեր: Միայն մեկը
հավանություն տալու պես ասաց՝ ինչ լավ համընկավ: Այսպես է բանը: Բայց այսօր ես կիթառ
չունեմ, դուք գրանադիկա չեք լսի: Մի ուրիշ անգամ: Բայց հենց ամռանն են երգում
գրանադիկան, նաև ռոմանսներ:

Բոլոր ռոմանսերները ցայտում են մանկանց շուրթերին: Ամենաոյուրիշ բալլադները, որոնց
չի գերազանցել ոչ մի ռոմանտիկական բանաստեղծ, ամենաարյունոտ լեգենդները բառային
մի աննկարագրելի հրավառություն են: Այս բոլորը անսպառ է: Վերցրեք պատահականը,
ասենք այն, որ տղաները երգում են գյուղերում, իսկ Ալբայսինի քաղաքային հրապարակում
երգում են աղջիկները:

Օգոստոսյան գիշերով ո՞ւմ չի հափշտակի հերցոգ Ալբայի մասին ռոմանսի այս քնքուշ
մեղեդին.

Սևիլայում բամբասանք կա,
 հազար ու մի այդպիսի բան,
 թե ուրիշ մի աղջկա է
 ընտրելու հերցոգ Ալբան:
 — Թող ընտրի ում որ կուզի.
 այդ լուրը ինձ հեչ չի հուզում:
 — Ամոթ բան է. քիչ ուշ, քիչ շուտ՝
 պատվի վրա բիծ է անշուշտ:
 Վերնահարկի պատուհանից
 նա նայում էր ներքև՝ փողոց,
 որ լեցուն էր ժողովրդով:
 Իսկ հերցոգը շատ անվրդով
 թևանցուկ էր արել արդեն
 իր նորընծա ընկերուհուն:
 Նշաններ են պայմանական
 իշխանի հետ առնում-տալիս.
 — Հը, ի՞նչ կա էլ՝ Աննա Մարիա:
 — Օ՛, իմ հերցոգ, հերցոգ Ալբա,
 դու իմ միակ, իմ ցանկալի,
 բամբասա՞նք է, թե ճիշտ, ասա,
 հարսանիքի ամբո՞խ սա:
 — Չգիտեմ էլ ինչ ես լսել,
 նշանվելս ճիշտ են ասել,
 հարսանիքն էլ վաղն է: Ահա,
 քեզ էլ հյուր եմ կանչում, Աննա:
 Բայց ավարտեց խոսքը, թե չէ՝
 Խեղճ Աննայի սիրտը ճաքեց:
 Չարմանք բան էր: Դե, կանչեցին
 Ալլադավան մի բուժակի,
 և բուժակը սիրտը բացեց:
 Այնտեղ գտավ ոսկե գրեր՝
 սրտիկի մոտ, մի քիչ վերև,
 իսկ սրտիկը ամբողջ վերք էր:
 Վերևում կարդացին «հերցոգ»,
 ներքևում «իմ ցանկալի»:
 — Ախ, եթե ես իմանայի,
 որ սրտումդ ես եմ միայն,
 իմ աղավնյակ, իմ Մարիա,
 ես քեզ մի՞թե կքեի:

Կարմիր կաճանով թաթերի վրա գողունի մոտենանք խմբված մարդկանց, որոնք կիսով չափ
 երևում են ձորակից: Այստեղ երգում են ու պարում: Հնչում են կաստանյետները, կիթառը և
 զուտ խաշնարածների գործիքներ՝ եռանկյունիներ ու դափ:

Նրանք երգում են ռուս և ալբորեաս, և՛ կաչուչու, և՛ այն նույն սորոնգոն, որն այնպես
 տիրաբար մտավ Ֆայայի երաժշտության մեջ:

Դեղին հեռուներից դեպի լեռներն է քաշվում օրը և նրա հետ գնում են հնձի ու կալի երգերը,
 սակայն դաշտերի այդ աշխարհը Գրանադա չի թափանցում... (ձեռագրում էջ է պակասում):

Սեպտեմբերն է դրսում, ոսկորս մրսում է,
 վերջին դարձն է անիվը անում:
 Դարձիր, ակ. քո դարձը նախշուն է,
 չէ՞ որ դեռ ճամփին է աշունը:

Եվ սկսվում են խնջույքները: Ալ ալոճով ու մասուրով, սերկևիլի թեջերով ու բլիթների
 աշտարակներով, և Կորսոյի փոփ նշակարկանդակով:

Միքայել հրեշտակապետը՝ Սան Միգելը իր բարձունքից մեկնում է արևածաղկով
զարդարված սուրը.

Վերևում հին ամրոցի,
Նախշերում ձիգ հմուլի
մոմերի բոցով է լի
Սան Միգել եկեղեցին:
Ներքևի իր խորանից,
գիշերվա գեշ նշանով,
սարքովի մի հրեշտակ
հագնում է սոխակի շոր:
Շնչելով թուրմը ծաղկի,
երագում միշտ ցողը թարմ,
ապակե իր տապանում
երգում է առանց մեղքի:
...Սան Միգելն է լոկ այնտեղ
մթան մեջ հանգիստ կանգնած,
զարդարված հմայիլով,
նշանով զոդիակի:
Չարդարված կանգնած է միշտ
բերբերյան իր հմայքով,
Նախշերով արաբական,
ինչպես տեր կենտ Նիշերի,
լեռների եղեմական...

Բերբերյան հմայք ու արաբական Նախշեր— Ձիթապտղի բլրի Գրանադան է: Այն ամենը, ինչ
հասնում է այստեղ՝ աղոտ է: Դա ողջ Գրանադայի երգն է, գետերի ու լարերի, ամբոխի և
տերևների, մրգի ծովի ու ճոճանակի ծիծաղի միախառնված ու մեկից արձակվող ձայնն է:

Բայց խուճանում է Միքայելի օրվա ուրախությունը, և աշունը անձրևների շաչյունով թակում
է դռները.

Թըփ, թըփ...
Այն ո՞վ է որ:
— Ներս մտա ես քո շեմով.
Թախիծն եմ աշնանային:
Երեսդ ի՞նչ է դառել:
— Բունքերիդ կուպր կա դեռ:
— Բեզ չեմ տա, կորի գնա:
— Կտանեմ, կյանքս վկա:
Թըփ, թըփ...
Նույն մուլթն է մառ.
— Եկա քեզ իբրև ձմեռ:

Առաջին հեղեղներից կանաչել են հանդերը: Ցրտերն զգալի են, և այգի գնալու հավես չկա
այլևս, իսկ խեղճ Լուսնասերը կռացել է թավայի վրա: Մայրամուտները կեսերկնքով են.
չտեսնված ամպերը սրբել տարել են Լեռնապարը, և օտար փայլեր են սողոսկում ծածկերի
տակ ու մարում են տաճարի զանգակատանը: Նորից անկեղծ կարոտով հնչում է ձայնը.

Քո տան պատշգամբից
գետախորշին կախված
տուր ինձ թաշկինակդ,
վերքս չի կապված:
Քո տան պատշգամբից
հոսող ջրին Նայոդ
տուր ինձ թաշկինակդ,

այլևս չեմ կարող:
Քո տան պատշգամբից,
որ նախշը ուրբուն է,
նետիր թաշկինակդ,
ես մահանում եմ:

Պարզվում է, որ երեխաները տարվել են ֆռռիկ խաղալով ու դպրոցը մոռացել են:

Պարզվում է, որ տներում վառել են ննջեցյալների հիշատակի մոմերը:

Պարզվում է՝ արդեն նոյեմբեր է:

Այրվող ծղոտի հոտ է, և փտում են թափված տերևների կույտերը: Հիշո՞ւմ եք: Հեղեղ է, և քաղաքը դատարկ է:

Սանտա Ֆեից, կամ Էլ Արմիլիայից, կամ Էլ Ատարֆեից մի աղջիկ, արդեն մի տարով մեծացած և, գուցե սգավոր, երգում է տանտիրոջ երեխաների համար.

Գետանցի այն չորսից,
որ մոտ են ջրհոսին,
այն մեկը՝ ջորովը,
կուզենամ ինձ հասնի:
Գետանցի այն չորսից,
(քիչ մոտ են կայանին)
ջորովը սրտովս է,
կդառնամ նրան կին:

Մենք ճանապարհ դրինք տարին: Այդպես է կարգը: Այսօր և այսուհետ: Մենք մեկնում ենք, իսկ Գրանադան մնում է: Մնում է դարերի մեջ և հալվում է իր որդիներից ամենաանարժանի ահա այս խեղճ ափերի մեջ: